

## INTERVJU

Volfgang Petrič, predsjedavajući  
Asocijacije BiH 2005.

# Bosni i Hercegovini treba demokratska revolucija

Ponekad se pitam zašto bi nacionalne stranke, s obzirom na svoju etničku bazu uopšte bile zainteresovane za građansku Evropu

Volfgang Petrič, predsjedavajući *Asocijacije BiH 2005.* i bivši visoki predstavnik međunarodne zajednice u BiH, ponovo boravi u našoj zemlji. Priprema se za decembarsku međunarodnu konferenciju o tome koliko kultura jugoistočne Evrope može doprinijeti integraciji regiona u EU. Prisustvovaće i komemoraciji u Srebrenici.

Iako je Bosni i Hercegovini sada posvećen na sasvim drugačiji način, razgovor smo vodili iz vizure njegove uloge visokog predstavnika u našoj zemlji i čovjeka koji objektivno može da sagleda bh. stvarnost, koja je u očima običnog građana neizmijenjena još od vremena kada je on u njoj bio vrhovni autoritet.

## Ipak progres

● **Šta sada kažete kada vas upitaju o Bosni i Hercegovini?**

“Optimista sam i pokušavam da ukažem na progres koji je ovdje načinjen. Moji prijatelji kažu da je BiH neprepoznatljiva u odnosu na ratni period, ali to za mene nije dovoljno. Pokušavam da objasnim ovu zemlju u kontekstu izuzetno teške i kompleksne situacije kroz koju je prošla, te zašto proces zacjeljivanja sporo ide”.

● **Šta narastajući euroskeptizam u EU za nas u BiH znači?**

“Postoji trajna opredijeljenost EU da zapadni Balkan postane njen dio. Ali definitivno, ako među najvećim “igračima” u EU postoji manjak volje, onda vjerujem da smo u kritičnoj situaciji. Izlaz vidim u tome da BiH ponovo intenzivira napore na ispunjenju uslova.

Naravno, gajim određene sumnje da su nacionalne partije istinski za to zainteresovane. Ponekad se pitam zašto bi uopšte i imale interesa, s obzirom na svoju etničku politiku. Jer, Evropa je bazirana na građaninu i njegovom individualnom pravu.

Trebaju nam istinski napori multietničkih stranki, civilnog društva, javnosti, mladih generacija, da promovišu ideju jedinstvene BiH, da bi se ona, na kraju pridružila EU”.

● **Ako je međunarodna**



Volfgang Petrič: promocija ideje jedinstvene BiH

Foto: D. ČUMUROVIĆ

## Neka svako bira svoje

● **Kako komentarišete inicijativu bh. građana upućenu Vijeću za implementaciju mira da sami biraju visokog predstavnika?**

“Vjerujem da građani mogu biti više uključeni u odlučivanje međunarodne zajednice, ali, naposljetku je odgovornost međunarodne zajednice da odluči o takvom čovjeku. Bitnije je da građani izaberu ispravne lokalne političare”.

**zajednica opredijeljena da vidi BiH u EU, zašto je onda vizni režim tako strog za bh. građane?**

“Kritičan sam prema EU, jer je do sada mogla naći labaviji pristup, da poslovni ljudi, sportisti, studenti i umjetnici iz BiH, lakše prelaze šengenske granice. Jer, kriminalci svakako sebi nalaze put. Ipak, vizni režim će zavisiti od funkcionalnosti bh. političkog sistema, DGS-a, CIPS-a...”

● **Reforma policije je zaustavljena, važni zakoni još nisu usvojeni, Vijeće ministara je u krizi. Šta bi ste u ovom momentu učinili da ste visoki predstavnik?**

“Mislim da je deset godina nakon Dejtona krajnje vrijeme da politiku preuzmu ovdašnji čelnici. Ključni problem je što ne postoji dovoljno jak pritisak javnosti na političare u BiH”.

## Domaći angažman

**Ipak, da li bi ste nametnuli neke odluke u vezi sa spomenutim?**

“Ovo nije vrijeme za nametanje odluka. To je bilo neophodno prije pet godina, ali sada je nužan aktivniji angažman domaćih političara u službi građana”.

● **Kolika je dogovornost međunarodne zajednice što će ove godine još jedna generacija studenata dobiti diplomu koja ne vrijedi van granica BiH?**

“Jedna od najvećih frustracija koje sam ponio iz BiH je što nije učinjeno više u modernizaciji školstva uopšte. Pitam se zbog čega su, uprkos sjajnim profesorima koje imate, univerziteti poput onih iz dvadesetih godina prošlog vijeka. Bitan je zakon o visokom obrazovanju, ali i reforme koje će doći iznutra. Sjetite se studentskih revolucija u Njemačkoj, Austiji i Francuskoj...”

● **Zakon o javnom RTV sistemu još nije usvojen. Vjerujete li da Hrvatima treba dati treći RTV kanal?**

“Volio bih da hrvatski političari koji stopiraju ovaj zakon barem jednom poslušaju BBC. Tamo se priča na mnogo jezika, ali su svi u jednom tijelu.

U Austriji i Njemačkoj postoji mnogo dijalekata njemačkog jezika, ali nikom ne pada na pamet da formira posebne kanale”.

Marina KAVAZ-SIRUČIĆ

## Za pomirenje treba hrabrost

● **Da li bi Vili Brant sa ovih prostora u liku srpskog političara i kontekstu srebreničkog genocida, doprinio konačnom pomirenju naroda u BiH?**

“Srebrenica je za mene ključna stvar u osvještenju društva i u BiH i u SCG. Bez prihvatanja odgovornosti SCG neće postati dio Evrope. Namjera predsjednika Tadića da dođe u Potočare pokazuje da raste broj srpskih političara koji su na to spremni. Ne bih Tadića poredio sa Brantom. Definitivno treba više hrabrosti, da bi došlo do pomirenja”.